

La nova cunvegna da prestaziun tranter LR e chantun è sut tetg

■ (Ir) La regenza dal chantun Grischun ha deliberà la cunvegna da prestaziun tranter il chantun e la Lia Rumantscha (LR). La cunvegna, ch'è la segunda da quest gener, regla las prestaziuns da la Lia Rumantscha per ils onns 2013 fin 2016.

La cunvegna da prestaziun sa basa sin l'artitgel 11 da la Lescha da linguas sco era sin ils artitgels 9–11 da l'Ordinaziun da linguas dal chantun Grischun. Las prestaziuns che la Lia Rumantscha sto ademplir cumpiglian ils champs da la linguistica applitgada, da la furmaziun, da projects, da cussegliaziuns sco era d'ediziuns e produziuns. Questas prestaziuns vegnan bunifitgadas finanziaimain da la confederaziun e dal chantun. La Lia Rumantscha retschaiva per ils onns 2013 fin 2016 ina contribuziun annuala, avant eventualas reducziuns, da var 2,65 miu. francs per las prestaziuns numnadas, da quels contribuescha il chantun Grischun var 0,5 miu. francs. La cunvegna da prestaziun precedenta per ils onns 2009 fin 2012 cuntegneva in volumen da prestaziun da var 2,52 miu. francs. Totalmain conceda la confederaziun al chantun Grischun annualmain var 4,75 miu. francs per il mantegniment e la promoziun da la lingua e cultura rumantscha e taliana en il chantun Grischun.

La cuntinuaziun da la Chasa Editura Rumantscha (CER) è garantida

Ina part integrala da la cunvegna da prestaziun per ils onns 2013 fin 2016 è la CER. Fixadas èn las suandantas directivas: areguard il program ston ils gremis da la LR garantir l'indipendenza da la CER. Las incumbensas e l'organisaziun interna da la CER vegnan regladas en statuts che correspundan a la furma giuridica. Resguardond ils idioms ed il rumantsch grischun ston vegnir edids mintg'onn almain sis titels, da quai almain quatter che sa drizzan a creschids, ils ulteriurs titels pon er sa drizzar ad uffants e giuvenils. La cunvegna da prestaziun preveda meds finanziais da 180 000 francs liads a l'intent da manar la CER. Il gremi editorial che decida tge che vegn edì vegn furmà cun consentiment da la confederaziun e dal chantun.

www.liarumantscha.ch

La Lia Rumantscha dat da nov la pusaiavadad a la CER d'edir l'entir program d'ediziun per uffants e giuvenils da la LR. La CER vegn uschia ad edir ils dus titels per uffants e giuvenils ch'èn definids sco dumber minimal en la cunvegna da prestaziun e supplementarmain ulteriurs dus fin trais titels. Uschia vegn la CER rinforzada e po augmentar si'actividad.



La cuntinuaziun da la Chasa Editura Rumantscha (CER) è garantida.